

SOALAN NO: 23

PARLIMEN MALAYSIA
PEMBERITAHU PERTANYAAN DEWAN RAKYAT

PERTANYAAN : Lisan

DARIPADA : Dato' Sri Ikmal Hisham Bin Abdul Aziz [Tanah Merah]

TARIKH : 27 Mac 2018 (Selasa)

SOALAN : Dato' Sri Ikmal Hisham Bin Abdul Aziz [Tanah Merah] minta MENTERI PERTANIAN DAN INDUSTRI ASAS TANI menyatakan apakah langkah yang dilakukan oleh Kementerian dalam membendung masalah Malaysia menjadi 'dumping zone' untuk hasil pertanian sehingga ia boleh menjejaskan petani tempatan.

JAWAPAN

Tuan Yang Dipertua,

Pelbagai peraturan sedia ada dan implementasi kawalan kuota import bahan pertanian telah dilaksanakan oleh pihak Kementerian Pertanian Dan Industri Asas Tani (MOA) dalam mengelakkan Malaysia menjadi 'dumping zone' untuk hasil pertanian. Di bawah perjanjian WTO, Malaysia telah menguatkuasakan peraturan 'anti-dumping' dalam memastikan tindakan dapat diambil kepada sistem perdagangan yang tidak adil oleh pihak pengeksport/pengeluar luar negara termasuk bahan pertanian terhadap pengusaha pertanian tempatan. Pihak MOA juga sentiasa memastikan tidak berlaku pelanggaran peraturan 'anti-dumping' seperti yang telah dipersetujui di bawah perjanjian ini. Kawalan import bahan pertanian melalui peraturan berkaitan sanitasi dan fitosanitasi (SPS) tumbuhan memainkan peranan penting dalam memastikan bahan pertanian yang dibawa masuk adalah dikawal dari segi kuantiti (kuota) dan keselamatan bahan pertanian (perosak/penyakit, sisa baki racun dan kesan rawatan kuarantin).

Akta Kuarantin Tumbuhan 1976 dan Peraturan-peraturan Kuarantin Tumbuhan 1981 dan Akta Racun Makhluk Perosak 1974 dikuatkuasakan untuk mengelakkan berlakunya

kemasukan bahan pertanian yang berisiko kepada industri tanaman negara. Ini amat penting untuk memastikan hanya produk bebas perosak dan selamat dimakan dibawa masuk ke dalam negara. Implementasi keperluan sijil fitosanitasi dan import permit melalui peraturan-peraturan ini juga dapat mengawal kemasukan bahan tanaman secara mudah dan seterusnya mengelakkan lambakan produk luar negara di pasaran tempatan. Selain itu juga melalui penguatkuasaan akta, kebolehesanan (*tracibility*) produk juga dapat dibuat kepada produk-produk yang dieksport semula (*re-export*).

Pengwujudan kuota import bagi bahan pertanian seperti kobis dan kelapa juga mampu mengimbangi kemasukan produk tersebut dari negara-negara jiran dan pengeluaran dari dalam negara. Melalui sistem kuota, kuantiti import adalah bergantung kepada keperluan pasaran dan ianya dapat dikurangkan apabila petani tempatan meningkatkan pengeluaran hasil dalam memenuhi keperluan pasaran semasa.